

# Txirritola

ARAMAIO / Barikua / 2002ko otsailaren 8a / 15. zenbakia

KOORDINATZAILEA: Ubane Madera • Otolara Lizentziaduna 31 2500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com

## Herriko lan handien ondorioz, Udalak diru gutxiago du aurten

UBANE MADERA

Aurten, Aramaioko Udalak bestetan baino diru gutxiago izango du. Ondorioz, Udaleko sail guztiek ere diru gutxiago izango dute gastatzeko. Eta horrek eragina du herritarrengan. Zenbateraino eragingo duen jakiteko eta gaia apurtxo bat argitzeko, Iñaki Nafarrate alkatearekin berbetan izan gara.

Hark adierazitakoaren arabera, diru kopuruari dagokionez aurtengo aurrekontuaren eta beste

urte batzuetako aurrekontuaren artean ez dago alde handirik. Baina aurten, "konpromiso batzuk hartuta ditugu, adibidez, kultura etxea". Izan ere, batetik, kultura etxearen zati bat ordaindu beharko du Udalak; eta, bestetik, kultura etxea bera kudeatzeak, garbitzeak eta mantentzeak ere gastuak sortu ditu, eta horiek ere berriak izango dira Udalarendako.

Iñaki Nafarrate alkateak adierazitako beste konpromiso bat Oletako lanak dira: saneamendua eta gasifikazioa. "Bi obra horiek

oso garestiak eta inportanteak dira Oletarendako, baina auzoak berak bakarrik ezin die aurre egin". Hortaz, besteak beste, Udalaren laguntza jasoko du Oletak, eta, jakina, horretarako ere dirua ipini behar du Udalak. Oro har, "Oletako lan horrekin eta kultura etxetik zor dugunarekin, itota gaude".

Ondorioz, Udalak arlo guztietan egin behar izan ditu diru murrizketak. Edozelan ere, alkatearen esanetan, "ez dut uste jendeak askorik igarriko duenik. Adibidez, orain arte, jaietarako 240.000 pezeta eman baditugu eta aurten 140.000 ematekin baditugu, jaitsiera oso inportantea da; hala ere, gura izanez gero, jaiak berdin-berdin egingo dira. Dena da erlatiboa".

Edozelan ere, Aramaion egiten ari diren lan handi horien garrantzia nabarmendu gura izan du alkateak. Haren ustez, auzoetako gasifikazioa derrigorrez egin beharreko erronka da. Baina kontuan hartu behar da Aramaioko auzoak oso sakabanatuta daudela, eta dena askoz ere garestiagoa dela. Kultura etxea, berriz, oso inportantea dela uste du: "Liburutegian, adibidez, lehen apenas izaten zen jendea, eta orain mordoa izaten da". Eta, aurrera begira, aurrekontua poliki-poliki egokituz joango dela esan du alkateak.



ARTIBOIA

Kultura etxeak eta Oletako lanek eraman dute aurrekontuaren kopururik handiena.



## Egin dute Albinako itxitura


Orain dela hiruzpalau urte, Udala Albinako itxitura egin guran hasi zen. Han ganadu asko dago, eta errepidea zelaitik gertu. Ondorioz, istripu ugari izan dira. Gainera, gero eta gidari gehiagok hartzen du Albinako bidea Gasteizera joateko, hortaz, arriskua gero eta handiagoa da. Hori konpontzeko, orain dela hiru urte, Udalak errepideko zoruan sareta ipini zuen. Baina, hori ez zen nahikoa eta, baimena lortu eta gero, orain, hesia ipini du. Hain justu, Kurtzeta gainetik Marixekarainoko hesia ipini dute (4 bat Km). 66 mila euro pasatxo inbertitu dituzte lan horretan.

## ATREBENTZIAEZPADA/ Gustura zaude kultura etxearekin?



LUCIA DELGADO  
Erretiratua

Oso ondo iruditzen zait, eta oso gustura nago kultura etxearekin. Batez ere, erretiratuen egoitzara eta eskulanak egitera joaten naiz ni.



JOSE BEITIA  
Erretiratua

Guk, zaharrok, geure lokala daukagu eta oso ondo gaude. Orain behean ipini gaituzte. Zaharrendako eta larri samar gabiltzanondako, hobeto.



LUCIA SOUSA  
Etxekoandrea

Niri gustatzen zait. Lehen baino askoz hobeto dago. Liburutegia du, gazteendako gaztetxea... denetik du, bai, oraingo kultura etxeak.



JORGE ASPE  
Langilea

Ni, behinik behin, gustura nago. Liburutegia, ludoteka... erabiltzen ditugu. Herriarendako beharrezko zerbitzua dela uste dut.



VIRGINIA BERMEJO  
Langilea

Bai. Umea eraman dezaket hara gura izanez gero. Behar genuen, bai, horrelako zerbait herrian, bereziki, eguraldi kaskarreko egunetarako.

## LABUR

### Aratusteak: zapatuan eta martitzenean

Zapatuan, Aramaioko kaleak kolorez beteko dira. Aratuste eguna da-eta. Ospatzeko mozerro lehiaketa izango da herrian. Lehiaketa 17:00etan irtengo dira kitx degitik. Eta, gero, 18:00etan partaideen artean sei sari banatuko dituzte, herriko plaza. Martitzenean, berriz, San Martin Eskolako umeek jolas sak izango dituzte, eskolaren bertan, arratsaldean. Urteroko ohiturari eutsiz, seigarren mailako ikasleak arduratuko dira jaiaren antolaketa.



**TELEFONO JAKINGARRIAK**

**OSASUNA / LARRIALDIAK**

Osasun etxea (txandak) .....	945 44 53 40
Botika .....	945 44 50 03
Udaletxea .....	945 44 50 16
Ertzaintza (Arrasate) .....	943 79 71 99
Gurutze Gorria (Legutio) .....	945 45 52 52
San Martin Eskola .....	945 44 50 04
Taxia eta autobusak .....	945 44 50 33
Udal kiroldegia .....	945 44 53 35
Postebetea .....	945 44 50 83
Zuiaiko Eskualdea .....	945 43 01 67
Suhiltzaleak (Zubillaga) .....	943 78 28 00

**AUTOBUSORDUTEGIA**

<b>ARRASATE</b>	<b>ARAMAIO</b>	<b>GASTEIZ</b>
07:00	07:15	08:00
12:00	12:15	13:00
15:20	15:35	16:20
20:30	20:45	
<b>GASTEIZ</b>	<b>ARAMAIO</b>	<b>ARRASATE</b>
08:30	09:15	09:30
13:10	13:50	14:05
	17:00	17:15
19:30	20:15	20:30

**LABUR**

**ARETO FUTBOLEKO EMAITZAK**  
Emaitza politikak ekarri zituzten joan den asteburuan Aramaioko areto futbol taldeek. Kadete mailako mutilek 7-4 irabazi zieten Presentacion de Maria ikastetxeko mutilei. Eta neskek, berriz, 6-4 irabazi zuten Arezketa Ikastolaren kontra jokaturako partiduan. Oraingo asteburuan, bestalde, atsedean hartuko dute talde biek, Aratustek dira eta.

**PALETA TXAPELKETA**  
Aurreko asteburuko emaitzak hauexek dira: Nafarrate-Flores 27, Azurmendi-Arriolabengoa 35; Emilio-Xabi 35, Berasaluze-Errasti 28; Abarrategi-Arriolabengoa 20, Armendariz-Orobengoa 35; Aspe anaiak 18, Barandiaran aita-emeak 35. Eta, dagoeneko, hasi dira txapelketaren amaiera aldera iristen. Horrela, oraingo zapatuan, oso partidu interesgarriak izango dira, finalerdietarako sailkapenerako balioko dute eta. Honako bikote hauek jokatu dute: 09:00etan, Amasena anaiak, Nafarrate-Flores; 11:00etan, Ojanguren-Garaita, Berasaluze-Errasti; eta, 12:00etan, Azurmendi-Arriolabengoa, Armendariz-Orobengoa.

**ZINEMA**  
Oraingo honetan, *102 Dalmatas* filma emango dute kultura etxean, 17:00etan, betiko moduan.

**OHITURA ZAHARRAK**

**Herriko nagusiak zapatuan eta gaztetxoek astelehenean, Santaren eskean**

Hogei lagun pasatxo elkartu ziren joan den zapatuan Santa Ageda eskean ibiltzeko. Ibarra-Eguzkierripa ibilbidea egin zuten eta, esandakoaren arabera, eguraldi ona lagun, oso giro politean ibili ziren. Auzokideek ere pozik hartu ei zituzten. Bitxikeria moduan, zenbait baserritan txerria hiltzen ari zirela harrapatu zituzten, eta oso giro polita sortu zela adierazi digute. Gutxi gorabehera, 580 euro pasatxo batu dituzte kantariek. Diru hori Bixente Goikoetxea Abesbatzarendako izango da, iaz, parrokiako organoa konpontzeko dirua eman zuten eta.

Astelehenean, berriz, gaztetxoek txanda izan zen. San Martin Eskolako 110 umeak mailaka banatu eta Aramaioko auzoetan kantuan ibili ziren. Goizeko bederatzietan hasi ziren, eta talde bakoitzari zegokion auzoa egin eta gero itzuli ziren. Izan ere, eskolan Santa Ageda eguna aprobetxatzen dute, ikasleek Aramaioko auzoak bisita ditzaten (euretari-ko askok ez dituzte eta herriko auzo asko ezagutzen). Urtero, maila bakoitza auzo batera joaten da; hala, eskola bukatzen dutenean, auzo guztiak ezagutzen dituzte.



**HERRIKO JOLASAK**

**KULUNKATZEKO JOLASAK (TXUTXURRUTXUKE)**

Kulunkatze era hori gurdien erabilera gutxitzearekin batera desagertuz joan da. Badira, agian, berrogei bat urte desagertu zela. Udaberri partean asko egiten ei zen.

Ume talde bat gurdiaren atzeko aldean esertzen zen eta indartsuena, hagan hankalatraba eginez, aurreko aldean. Abesti bat kantatzen zen eta bukatu arte goian edukitzen zuten:

- Txutxurrutxu mañe
- Nun da attejaune
- Zeruetan jaune
- Zetan zeruetan
- Artue karraiketan (edo, arta karaunek batzen)
- Zetako artue
- Olluendako
- Zetako ollue
- Arrautzie eitteko
- Zetako arrautzie
- Olatie eitteko
- Zetako olatie
- Abadiendako
- Zetako abadie
- Mezie emoteko
- Zetako mezie
- Aingerutxo biren erdixen ipini
- Ta zerure jueteko

Eskola umeak izaten ziren, hamabi urte artekoak. Asperitzen zirenean uzten zioten jolasari.

*Aramaioko joko eta jolasak liburutik*

**BOTEPRONTOAN/ Iker Olaziregi · Arraga auzoko alkatea**

**“Auzoarendako aberasgarria izan da Iturrieta sagardotegia zabaldu izana”**

**I**barratik gora eginez, Etxaugen eta Gantzaga moduan, Arraga auzoarekin ere egingo dugu topo. Akaso, azken urteotan apurtxo bat ezagunagoa egingo zaigu auzo hori, Aramaion zabaldu duten Iturrieta sagardotegia dagoen auzoa da eta. Zerbait gehiago jakin guran, Iker Olaziregirekin izan gara berbetan, Arragako auzo-alkatearekin. Beste gauza askoren artean, kontatu digu hura dela auzo-alkateen artean gazteena:

**Auzoa da Arraga?**

Ibarra auzoaren barruan gaude. Gainerako auzoek, Arexolak, Etxaugenek... kanposantua dute, guk ez. Elizatea-edo dela uste dut.

**Auzo-alkate?**

Bai. Azkeneko aldiz hauteskunde bitartez egin genuen, eta neu aukeratu ninduten. Auzo-alkaterik gazteena naiz. Hirugarren urtea beteko dut, azkena falta zait. Eta ez dut uste segituko dudarik, hemen gazte gehiago ere badaude...

**Zenbat zarete auzoan?**

Hogeita lau bat lagun eta zazpi baserri, lehen baino bat gehiago. Lehen ardi korta bat zena orain baserri egin dute. Orain arte baserritik bakarria bizi zen; eta orain, sagardotegikoak...


**Zelan igarri duzue auzoan Iturrieta zabaldu izana?**

Ondo. Auzoarendako aberasgarria izan da hori. Lehen hemen ez zegoen ezer, eta orain taberna dugu... Gureta-ko oso-oso ondo.

Gauza txar bakarria dauka: bide txarra dugu, eta sagardotegiaren ondorioz, zirkulazio handia izaten da, autobusak... **Ermitea pribatua duzue Arragan?**

Bai, horixe esaten dute, eta ez da gurea. Dena dela, garbiketant gure amama ibiltzen da... Hortaz, parteren bat izango dugu. San Pedro eta San Pablo daude ermitan, baina auzoan Arragako San Pedro esaten zaio.

**Jaiak?**



San Pedrotan, ekainaren 29an. Meza egiten dugu eta gero, azken urteotan, plazatxo horretan merienda antzekoa egiten dugu, auzoko guztiak elkartzen gara, dantza apur bat egiten dugu, kontu batzuk kontatu... Eta horrelaxe izaten da. Hemengo jaiak hemen izaten da, eta kito. **Tontor berezi bat ere baduzue?**

Aramaioko erdi-erdian dago; orduan, jende guztia zaintzen dugu hemendik: zein dabilen lanean eta zein ez... (barreak) **Zer eskatuko zenioke Udalari?**

Bidea konpontzea; sagardotegia dela eta... apur bat nasaitzeko-edo.

**Bada Arragan jaiotako pertsonaia garrantzitsurik?** Garrantzitsuak guztiak, auzoko guztiok.

**Zer du bisitariarendako?** Haizea ibiltzen da, kristoren haizea ibiltzen da (barreak). Eta, bestela, sagardotegia eta parajeak.